

# 'Keluarga Dunia' antara kandungan ucapan PM

BH- 28/9/2021 m/s: 3

**Putrajaya:** Konsep 'Keluarga Dunia' antara isi kandungan ucapan akan disampaikan Perdana Menteri, Datuk Seri Ismail Sabri Yaakob yang mengetuai delegasi Malaysia pada Sesi Debat Umum Perhimpunan Agung Pertubuhan Bangsa-Bangsa Bersatu (UNGA) Ke-76.

Ketua Setiausaha Kementerian Luar Negeri, Datuk Seri Muhammad Shahrul Ikram Yaakob, berkata Perdana Menteri dijangka menyampaikan ucapan itu melalui sidang video yang akan disiarkan bermula jam 11 malam ini waktu Malaysia.

Katanya, pendekatan konsep 'Keluarga Dunia' itu menggunakan pendekatan konsep 'Keluarga Malaysia' yang diperkenalkan Perdana Menteri di negara ini.

"Menerusi pendekatan itu, Malaysia komited untuk bekerjasama dengan keluarga dunia dalam mengurus, menangani dan me-

mulihkan keadaan semasa daripada pandemik COVID-19 serta penekanan diplomasi kesihatan yang menjadi antara fokus utama rangka dasar luar Malaysia.

"Ucapan beliau akan turut menyentuh usaha negara dalam mendepani perubahan iklim dan cabaran memenuhi matlamat pembangunan mampan di bawah Agenda Pembangunan Mampan 2030 (SDG 2030)," katanya pada sidang media di Wisma Putra, semalam.

UNGA bermula 14 September lalu di New York mendapat penyertaan lebih 50 negara anggota kebanyakannya menyertai secara maya. Sidang yang memberi tumpuan usaha memerangi perubahan iklim dan COVID-19, diadakan secara maya akibat ancaman pandemik.

Presiden Amerika Syarikat, Joe Biden yang menjadi tuan rumah persidangan kali ini akan

menyertai sesi secara maya dari Washington.

Muhammad Shahrul Ikram berkata, Perdana Menteri juga antara lain akan mengetengahkan konsep hidup bersama dalam budaya damai, terutama usaha mencapai genjatan senjata secara antarabangsa dan menanganikan cabaran berkaitan ketidaksemaan, ketidakstabilan politik dan tadbir urus dunia.

Malaysia juga, katanya, akan menyatakan pendirian tegas terhadap isu politik dan kemanusiaan seperti di Palestin serta Myanmar, selain keprihatinan terhadap perkembangan semasa di Afghanistan.

Beliau berkata, penyertaan Malaysia pada sidang itu penting bagi membolehkan negara menyampaikan iltizam pada peringkat antarabangsa dan memastikan pandangan, pendirian serta kepentingan negara dapat dikedengar atau dipertahankan.

Katanya, Ismail Sabri turut menyertai Sidang Kemuncak Sistem Makanan PBB dan sudah menyampaikan ucapan melalui video.



Muhammad Shahrul Ikram Yaakob